


# 欽定古今圖書集成/博物彙編/藝術典/第 263卷



以2025年1月13日从维基文库导出



## 欽定古今圖書集成博物彙編藝術典

### 第二百六十三卷目錄

#### 醫部彙考二百四十三

欬嗽門二

扁鵲難經 欬

張機金匱要略 雜證為欬

華佗中藏經 論臟腑虛實生死

王叔和脈經 欬脈

脈訣 欬脈

孫思邈千金方 欬論

朱肱活人書 欬嗽

劉完素六書 欬嗽論

張潔古活法機要 欬嗽證

張從政儒門事親 嗽分六氣毋拘以寒說

李杲十書 秋傷於濕冬必欬嗽論 濕氣所傷論 用藥

法

朱震亨心法 欬嗽

戴思恭證治要訣 欬嗽

樓英醫學綱目 治法 乾欬嗽

王綸明醫雜著 欬嗽證治

痰水上干

瘀血內阻 治分新久

藝術典第二百六十三卷

# 醫部彙考二百四十三醫部彙 考二百四十三

欬嗽門二欬嗽門二

《扁鵲難經》

《扁鵲難經》

欬欬

假令得肺脈：其外證：面白，善嚏，悲愁不樂，欲哭。其內證：齊右有動氣，按之牢若痛。其病：喘欬，洒淅寒熱。有是者肺也，無是者非也。

何以知傷寒得之。然。當譖言妄語。何以言之。「肺主聲。入肝為呼，入心為言，入脾為歌，入腎為呻，自

入為哭。」故知肺邪入心。為譫言妄語也。其病身熱洒洒惡寒。甚則喘欬。其脈浮大而濇。

肺之積，名曰「息賁」，在右脅下，覆大如杯。久不已，令人洒淅寒熱，喘欬，發肺壅，以春甲乙日得之。何以言之？心病傳肺，肺當傳肝，肝以春適王，王者不受邪，肺復欲還心，心不肯受，故留結為積，故知息賁以春甲乙日得之。

## 《漢張機金匱要略》

## 《漢張機金匱要略》

### 《雜證為欬》

### 《雜證為欬》

熱在上焦者，因欬為肺痿。

寸口脈數，其人欬，口中反有濁唾涎沫者，為肺痿之病。

問曰：「病欬逆脈之，何以知此為肺癰？當有膿血，吐之則死，其脈何類？」師曰：「寸口脈微而數，微則為風，數則為熱，微則汗出，數則惡寒。風中於衛，呼氣不入；熱過於榮，吸而不出。風傷皮毛，熱傷血脈；風舍於肺，其人則欬，口乾喘滿，咽燥不渴，多濁沫，時時振寒。熱之所過，血為之凝滯，蓄結癰膿，吐如米粥。始萌可掬，膿成」則死。

欬而上氣。喉中水雞聲。射干麻黃湯主之。

欬逆上氣。時時唾濁。但坐不得眠。皂莢丸主之。欬而脈浮者。厚朴麻黃湯主之。

欬而胸滿，振寒，脈數，咽乾不渴，時出濁唾腥臭，久久吐膿如米粥者，為肺癰，桔梗湯主之。

肺脹。欬而上氣。煩躁而喘。脈浮者。心下有水。小青龍加石膏湯主之。

胸痹之病，喘息欬唾，胸背痛，短氣，寸口脈沉而遲，關上小緊數，苦蕒薤白白酒湯主之。欬逆倚息不得臥，其形如腫，謂之支飲。

留飲者，脅下痛引缺盆，欬嗽則輒已。 一作轉甚

膈上病，痰滿，喘欬吐，發則寒熱，背痛腰疼，目泣自出，其人振振身潤劇，必有伏飲。欬家，其脈弦，為有水，十棗湯主之。

夫有支飲家。欬煩。胸中滿者。不卒死。至一百日或一歲。宜十棗湯。

久欬數歲，其脈弱者，可治；實大數者死。其脈虛者，必苦冒。其人本有支飲在胸中故也，治屬飲家。

「欬逆倚息不得臥，小青龍湯主之。」青龍湯已下，多唾口燥，寸脈沉，尺脈微，手足厥逆，氣從小腹上沖胸咽，手足痺，其面翕熱如醉狀，因復下流陰股，小

便難，時復冒者，與茯苓桂枝五味甘草湯，治其氣沖。

氣沖即低。而反更欬。胸滿者。用桂苓五味甘草湯。去桂加乾薑、細辛。以治其欬滿。

欬滿即止。而更復渴。沖氣復發者，以細辛、乾薑為熱藥也。服之當遂渴。而渴反止者為支飲也。支飲者法當冒。冒者必嘔。嘔者復內半夏以去其水。

寸口脈沉滑者，中有水氣，面目腫大有熱，名曰「風水。」視人之目裏上，微擁，如蠶新臥起狀，其頸脈動，時時欬按，其手足上，陷而不起者，風水。

太陽病，脈浮而緊，痛在骨節，欬而喘，不渴者，此為脾脹。其狀如腫，發汗即愈。然諸病此者，渴而下利，小便數者，皆不可發汗。

問曰：「病者苦水，面目身體四肢皆腫，小便不利。脈之不言水，反言胸中痛，氣上沖咽，狀如炙肉，當微欬喘，審如師言，其脈何類？」師曰：「寸口脈沉而緊，沉為水，緊為寒，沉緊相搏，結在關元，始時當微，年盛不覺，陽衰之後，榮衛相干，陽損陰盛，結寒微動，腎氣上沖，喉咽塞噎，脅下急痛。醫以為留飲而大下之，氣擊不去，其」病不除。後重吐之，胃家虛煩，咽燥欲飲水，小便不利，水穀不化，面目手足浮腫。又與葶藶丸下水，當時如小差，食飲過度，腫復如前，胸脅苦痛，象若奔豚，其水揚溢，則浮欬

喘逆。當先攻擊衛氣令止，乃治欬。欬止，其喘自差。先治新病，病當在後。

夫「吐血欬逆上氣。其脈數而有熱。不得臥者死。」夫酒客欬者。必致吐血。此因極飲過度所致也。

## 《華佗中藏經》

## 《華佗中藏經》

### 《論臟腑虛實生死》

### 《論臟腑虛實生死》

心病則先心痛，而欬不止，關膈不通，身重不已，三日死。

小腸者，受盛之腑也。欬則氣欬，一齊出也。

肺脈來毛而微，曰「不及」，不及則令人喘呼而欬，上氣見血，下聞病音，虛則寒生欬息，利下少氣力，多悲感。又肺病久欬而見血，身熱而短氣，脈當澀今反浮大，色當白，今反赤者，火剋金，十死不治。肺病喘欬，身寒無熱，脈遲微者可治，虛則不能息，耳重啞乾，喘欬上氣，肩背痛。又欬而遺小便者，上虛不能制下故也。飲酒中風，言則肺發欬嗽喘悶。見血者不可治，無血者可治。又其人素聲清而雄烈，暴不亮而拖氣用，言語難出，視不轉睛，雖未為病，其人不久又肺病矣。則上氣喘急，欬嗽身熱，脈大也。虛則力乏喘促，右脅脹，語言氣短者是也。

腎病腹大，體重滿，欬嗽，汗出憎風，又喉鳴，坐而喘，欬血出，亦為腎虛，寒氣欲絕也。

膀胱者，津液之腑也。膀胱欬而不已，則傳之三焦，腹滿而不飲食。

中焦實熱，則上下不通，腹脹喘欬，下氣不上，上氣不下，關格而不通。

暴欬嗽，脈數身瘦者死。暴欬嗽，脈散者死。暴欬，形肥脈急甚者死。病嗽而嘔，便滑不禁，脈弦微欲絕者死。諸病嗽喘，脈沉而浮者死。病欬嗽，脈沉堅者死。

## 《晉王叔和脈經》

## 《晉王叔和脈經》

### 《欬脈》

### 《欬脈》

右手寸口氣口以前脈陽實者，手陽明大腸經實也。病苦腹滿，善喘欬，面赤身熱，咽喉中如核狀。

凡亡汗，肺中寒，飲冷水，欬嗽下利，胃中虛冷，此等其脈並緊。

浮短者，其人肺傷，諸氣微少，不過一年，死法當嗽也。欬嗽，脈沉緊者死；浮直者生；浮軟者生，小沉

伏匿者死。

欬嗽羸瘦。脈形堅大者死。

欬脫形發熱，脈小堅急者死。肌瘦下脫形，熱不去者死。

《脈訣》

《脈訣》

《欬脈》

《欬脈》

肺脈歌曰：「沉緊相兼滑，仍聞欬嗽聲。」

《滑脈歌》曰：「寸滑膈痰生嘔吐，吞酸舌強或欬嗽。」《促脈歌》曰：「促脈惟將火病醫，其因有五細推之。時時喘欬皆痰積，或發狂斑與毒疽。」

《唐孫思邈千金方》

《唐孫思邈千金方》

《欬論》

《欬論》

經云：「五臟六腑皆令人欬。」肺居外而近上，合於皮毛，皮毛喜受邪，故肺獨易為欬也。邪客於肺，則寒

熱上氣，喘汗出，欬動肩背，喉鳴，甚則唾血。肺欬經久不已，傳入大腸，其狀欬則遺糞。腎欬者，其狀引腰背痛，甚則欬涎。腎欬經久不已，傳入膀胱，其狀欬則遺尿。肝欬者，其狀左脅痛甚，不得轉側。欬經久不已，傳入膽，其狀欬則嘔清苦汁出。「心欬者，其狀引心痛，喉中介介如梗，甚者喉痺咽腫。」

「《心欬》經久不已，傳入小腸，其狀欬則失氣。」

「脾欬者，其狀左脅痛，陰陰引肩背，甚者不得動，動則欬劇。經久不已，傳入胃，其狀欬而嘔，嘔甚則長蟲出。久欬不已，三焦受之。」三焦欬之狀，欬而腹滿，不能飲食。此皆聚於胃，關於肺，使人多涕唾而面浮腫，氣逆也。或順時有風寒冷氣，觸冒解脫，傷皮毛間，入腑臟為欬，上氣如此也。有非時忽然暴寒，傷皮膚中與肺合，則欬嗽上氣，或胸脅支痛，欬唾有血者，是其熱得非時之寒暴搏之，不得漸散，伏結深，喜肺癰也。因欬服溫藥，欬尤劇，及壯熱吐膿血，汗出惡寒是也。天有非時寒「者，急看四時方也。」問曰：

「欬病有十，何謂也？」師曰：「有風欬，有寒欬，有支欬，有肝欬，有心欬，有脾欬，有肺欬，有腎欬，有膽欬，有厥陰欬。」問曰：「十欬之證，以何為異？」師曰：「欲語因欬，言不得竟，謂之風欬；飲冷食寒，因之而欬，謂之寒欬；心下堅滿，則支引痛，其脈反遲，謂之支欬；欬則引脅下痛，謂之肝欬；欬而唾血，引手少陰，謂之心欬；欬而涎出，續續不止，引小腹，謂之脾欬；欬；引頸項而唾涎沫，謂之肺欬；欬則耳無所聞，引腰并臍中，謂之「腎欬」；欬而引頭痛，口苦，謂之膽欬；欬而引舌本，謂之厥陰欬。風欬者，不可下。寒欬，肢欬，肝欬刺足太衝，心欬刺手神門，脾欬刺足太白，肺欬刺手天

泉，腎欬刺足太谿，膽欬「刺足陽陵泉。厥陰欬。刺手太陵。」

夫久欬為疔。欬而時發熱。脈在九菽者。非虛也。此為胸中寒實所致也。當吐之。

夫《欬家》，其脈弦，欲行吐藥，當相人強弱而無熱，乃可吐耳。欬家，其人脈弦為有水，可與十棗湯下之。不能臥出者，陰不受邪故也。留飲欬者，其人欬不得臥，引項上痛，欬者，如小兒癰瘕狀。夫酒客欬者，必致吐血，此坐久極飲過度所致也。其脈沉者，不可發汗。久欬數歲，其脈弱者，可治；實大數者死。其脈虛者，必善冒。其人本有支飲在胸中故也。治屬飲家。上氣汗出而欬。屬飲家，欬而小便利。若失溺不可發汗，汗出即厥逆冷。

夫病吐血喘欬上氣，其脈數，有熱，不得臥者，死。寒家欬而上氣，其脈數者死，謂其人形損故也。脈大而散，散者為氣實而血虛，名曰「有表無裏。」上氣面附腫，肩息，其脈浮大，不治，加痢尤甚。上氣躁而喘者，屬肺脹，欲作風水，發汗愈。

凡上氣多有服吐藥得瘥，亦有鍼灸得除者，宜深體悟之。

《宋朱肱活人書》  
《宋朱肱活人書》

## 欬嗽欬嗽

傷寒欬嗽有兩證：有太陽證欬嗽，小青龍、小柴胡也；有少陰證欬嗽，真武湯、四逆散、豬苓散也。大抵熱在上焦，其人必飲水，水停心下，則肺為之浮。肺主於欬，水氣乘之，故欬而微喘。仲景云：「傷寒表不解，心下有水氣，乾嘔，發熱而欬，小青龍湯主之。」小便不利，小腹滿者，去麻黃加茯苓。往來寒熱，胸脅滿痛，或欬者，小柴胡湯主之，小柴胡去人參、大棗，加五味子、乾薑。若少陰證，欬嗽，四肢沉重疼痛，小便不利，自下利而欬，真武湯主之，真武湯加五味子、乾薑。大抵傷寒水氣，皆因飲水過多。古人治水氣而欬者，病在陽，則青龍湯主之；病在陰，真武湯主之。四肢厥逆，腹中痛，或泄利而欬，四逆散主之，四逆散加五味子乾薑下利六七日。欬而嘔渴。心煩不得眠。豬苓湯主之。

### 《金劉完素六書》

### 《金劉完素六書》

#### 《欬嗽論》

#### 《欬嗽論》

欬，謂無痰而有聲，肺氣傷而不清也。嗽，是無聲而有痰，脾濕動而為痰也。欬嗽，謂有痰而有聲，蓋因傷於肺氣，動於脾濕，欬而且嗽也。脾濕者，秋傷於濕，積於脾也。故《內經》曰：「秋傷於濕，冬必欬嗽。」大抵素秋之氣宜清，若反動之氣，必上衝而為欬，甚

則動於脾濕，發而為痰焉。是知脾無留濕，雖傷肺氣而不為痰也。有痰寒少而熱多，故欬嗽者，非專主於肺，肺主皮毛而司於外，故風寒先能傷之也。《內經》曰：「五臟六腑皆能令人欬。」非獨肺也，各以其時主之而受病焉，非其時各傳而與之也，所病不等，寒、暑、燥、濕、風、火六氣，皆令人欬。惟濕病痰飲入胃，留之而不行，止入於肺，則為欬嗽。假令濕在於心經，謂之熱痰；濕在脾經，謂之「風痰」；濕在肺經，謂之「氣痰濕」；在腎經，謂之「寒痰。」所治不同，宜隨證而治之。若欬而無痰者，以辛甘潤其肺。故欬嗽者，治痰為先；治痰者，下氣為上。是以南星、半夏勝其痰，而欬嗽自愈，枳殼、陳皮利其氣而痰自下。痰而能食者，大承氣湯微下之，少利為度。痰而不能食者，厚朴湯治之。夏月嗽而發熱者，謂之熱痰嗽，小柴胡四兩，加石膏一兩，知母半兩用之。冬月嗽而發寒熱，謂之寒嗽，小青龍加杏仁服之。然此為大例，更當隨證隨時加減之，量其虛實，此治法之大體也。一陽發病，少氣嗽洩，三焦不利，上欬下洩，心火不寧，其動若掣，調中散主之。

夫嗽者，五臟皆有，皆因內傷脾胃，外感風邪，皮毛屬肺，風寒隨元府而入，腠理開張，內外相合，先傳肺而入，遂成欬嗽，迺肺熱也。寒化熱，熱則生痰，故喘滿也。《經》云：「喉中介介如梗狀」，甚則嗽血也。胸滿氣喘，痰盛稠黏，皆肺氣熱也。

《張潔古活法機要》

《張潔古活法機要》

## 《欬嗽證》 《欬嗽證》

欬，謂無痰而有聲，肺氣傷而不清也。嗽，謂無聲而有痰，脾濕動而為痰也。欬嗽，是有痰而有聲，蓋因傷於肺氣，而欬動於脾濕，因欬而為嗽也。治欬嗽者，治痰為先；治痰者，下氣為上。是以南星、半夏勝其痰而能食者，大承氣湯微下之。痰而不能食者，厚朴湯治之。夏月嗽而發熱者，謂之熱痰嗽，小柴胡湯四兩，加石膏一兩，知母半兩用之。冬月嗽而寒熱者，謂之寒嗽，小青龍加杏仁服之。《蜜煎生薑湯》《蜜煎橘皮湯》燒生薑、胡桃皆治無痰而嗽者。此乃大例，更當隨時隨證加減之。

## 《元張從政儒門事親》 《元張從政儒門事親》

### 《嗽分六氣毋拘以寒說》 《嗽分六氣毋拘以寒說》

嗽與欬一證也。後人或以嗽為陽，欬為陰，亦無考據。且《內經欬論》一篇，純說嗽也，其中無「欬」字。由是言之，欬即嗽也，嗽即欬也。《陰陽應象大論》云：「秋傷於濕，冬生欬嗽。」又《五臟生成篇》云：「欬嗽上氣。」又《診要經終篇》云：「春刺秋分，環為欬嗽。」又《示從容篇》云：「欬嗽煩冤者，腎氣之逆也。」《素問》惟以四處連言欬嗽，其餘篇中

止言欬不言嗽，乃知欬嗽一證也。或言嗽為別一證，如《傷寒》書中說欬逆，即咽中作梯磴之聲者是也。此一說非《內經》止以嗽為欬。生氣通天論云：秋傷於濕，上逆而欬，與《陰陽應象大論》文義同，而無嗽字，乃知欬即是嗽明矣。余所以苦論此者，孔子曰：「必也正名乎。」嗽之為病，自古歸之肺。此言固不易也。《素問》言：「肺病喘欬逆。」又曰：「欬嗽上氣，厥在胸中，過在手太陰陽明。」《靈樞》十二經惟太陰肺經云：「肺脹滿膨膨而喘欬」，他經則不言。《素問·欬論》雖言五臟六腑皆有欬，要之止以肺為主。《素問》言：皮毛者，肺之合也，皮毛先受邪氣。註云：「邪謂寒氣。」經又云：邪氣以從其合也。其寒飲食入胃，從脾脈上至於「肺則肺寒，肺寒則內外合邪，因而客之，則為肺欬。」後人見是言，斷嗽為寒，更不參較他篇。豈知六氣皆能嗽，若謂欬止為寒邪，何以歲火太過，炎暑流行，金肺受邪。民病欬嗽，歲木不及，心氣晚治，上勝肺金，欬而鼽。從革之紀，金不及也，其病嚏欬，堅成之紀，金太過也。上徵與正商同，其病欬。少陽司天，火氣下臨，肺金上從，欬嚏衄。少陽司天，火淫所勝，欬唾血煩心。少陽司天，主勝則胸滿欬。少陽司天之氣，熱鬱於上，欬逆嘔吐。三之氣，炎暑至，民病欬嘔。終之氣，陽氣不藏而欬。少陽之復，枯燥煩熱、驚瘈欬衄，甚則欬逆而血泄。少陰司天，熱氣生於上，清氣生於下，寒熱凌犯而生於中，民病欬喘。三之氣，天政布，大火行，餘火內格，腫於上，欬喘甚則血溢。少陰司天，客勝則鼽嚏，甚則欬喘。少陰之復，燠熱內作，氣動於左，上行於右，欬，皮膚痛則入肺，欬而鼻淵。若此之類，皆生於火與熱也，豈可

專於寒乎？謂欬止於熱與火耶？厥陰司天，客勝則耳鳴掉眩，甚則欬。若此之類，乃生於風，豈可專於熱與火「也？謂欬專於風耶？」太陰司天，濕淫所勝，欬唾則有血。太陰之復，濕變乃舉，飲發於中，欬喘有聲。若此之類，乃生於濕，豈可專於風也？謂欬止於濕耶？金鬱之發，民病欬逆心脅痛。歲金太過，燥氣流行，肝木受邪，民病欬喘逆，逆甚而嘔血。陽明司天，金火合德，民病欬嗌塞。陽明司天，燥淫所勝，欬腹中鳴。「陽明司天，清復內餘，則欬衄嗌塞，心膈中熱，欬不止而白血出者，死。」陽明之勝，清發於中，嗌塞而欬。陽明之復，清氣大舉，欬噦煩心。若此之類，皆生於燥，豈可專於濕也？謂欬止於燥耶？太陽司天，客氣勝，則胸中不利，出清涕，感寒則欬。若此之類，乃生於寒，豈可專於燥也？又肺風之狀，多汗惡風，色餅「然白，時欬短氣，晝日則差，夜暮則甚，亦風欬也。勞風欬出青黃涕，其狀如膿，大如彈丸」，亦風欬也。有所亡失，所求不得，則發肺鳴，鳴則肺熱葉焦，亦熱欬也。陽明厥逆，喘欬身熱，亦熱欬也。《一陽》發病，少氣善欬，亦火欬也；喘欬者，水氣并於陽明，亦濕欬也。風水不能正偃則欬，亦濕欬也。腎氣腹大脛腫，喘欬身重，亦濕欬也。「脾痺」者，四肢懈惰，發欬嘔汁，上為大塞，亦寒欬也。欬之六氣固然，可以辨其六者之狀。

風乘肺者，日夜無度，汗出頭痛，涎痰不利，非風欬乎？熱乘肺者，急喘而嗽，面赤潮熱，手足寒，乳子亦多有之，非暑欬乎？火乘肺者，欬喘上壅，涕唾出血，甚者七竅血溢，非火欬乎？燥乘肺者，「氣壅不利，百節內痛，頭面汗出，寒熱往來，皮膚乾枯，細

瘡燥痒，大便祕澀，涕唾稠黏，非燥欬乎？」寒乘肺者，或因形寒飲冷，冬月坐「臥濕地，或冒冷風寒，秋冬水中感之，嗽急而喘」，非寒欬乎？其法治也。風之嗽，治以通聖散加半夏、「大人參半夏丸，甚者汗之。」暑之嗽，治以白虎湯、洗心散、涼膈散，加蜜一匙而呷之。火之嗽，治以黃連解毒湯、洗心散、三黃丸，甚者加以鹹寒大下之。濕之嗽，治以五苓散、桂苓甘露散，及白朮丸，甚者以三「花神祐丸下之。燥之嗽，治以木香葶藶散、大黃黃連阿膠丸，甚者以鹹寒大下之。寒之嗽，治以寧神散、寧肺散。有寒痰在上者，以瓜蒂散越之。」此法雖已幾於萬全，然老幼、強弱、虛實、肥瘦不同，臨時審定權衡可也。病有變態，而吾之方亦與之俱變，然則枯礬、乾薑、烏梅、鸞粟殼，其誤人也不為少矣。嗚呼！有人自幼欬嗽，至老不愈，而亦不死者。余見此等無限，或少年欬嗽，不計男女，不數月而殞者，亦無限矣。夫寧神寧肺散，此等之人，豈有不曾服者？其不愈而死者，以非寒欬、執款冬花、佛耳草，至死不移故也。曹魏時，軍吏李成苦欬嗽，晝夜不寐，時吐膿血。華佗以為非從肺來，以苦劑二錢匕，吐膿血二升餘而瘥。若此之嗽，人不可不知也。夫富貴之人，一切涎嗽，是飲食厚味熱痰之致然也。先用獨聖散吐之，吐訖，可服人參散、通聖散加半夏，以此止嗽。更服大人參半夏丸，以之化痰也。大忌酸鹹、油膩、生硬熱物也。

夫貧難之人欬嗽，內外感風冷寒濕之致然也。《內經》曰：「秋傷於濕，冬生欬嗽。」可服寧神散、寧肺散加白朮之類則愈矣。忌法同前。

凡男子有病，面黃身熱肌瘦，寒熱往來如瘧狀，更加涎嗽不止，或喘滿，面目浮腫者，或身體俱熱，或有自汗。《內經》云：「病名傷寒，夾勞之證也。」治之奈何？病在上者，其高者因而越之，可用防己散吐之。吐後切用通解丸一服，次服人參黃芪散、當歸飲子、加減小柴胡湯，擇而用之。《內經》謂男女之證，治法皆同，依此調治，無不取效矣。

## 《李杲十書》

## 《李杲十書》

### 《秋傷於濕冬必欬論》

### 《秋傷於濕冬必欬論》

秋者，清肅之氣，收斂下行之體也。為濕所傷，是長夏之氣，不與秋令也。秋令不及，所勝妄行，故火得以炎上而剋金。心火既刑於肺，故肺氣逆而為欬，所不勝者侮之。木氣上行，與火同德，動而不息者也。所生者受病，故腎水虧也。長夏已亢，三焦之氣盛也。命門者，三焦之合也。故迫腎水上行，與脾土濕熱相合為痰，因痰而動於脾之濕也，是以欬嗽有聲有痰，不發於秋，而發於冬者，以其六陰之極，肅殺始得其氣，故不欬嗽於秋，而欬嗽於冬也。欬嗽者，氣逆上行也，氣上行而逆，故面目發微腫，極則身體皆腫，變為水氣。故曰：「濁氣在上，則生臃脹。」又曰：「諸氣臃鬱，皆屬肺金。」此之謂也。春傷於風，夏傷於暑，冬傷於寒，辭理皆順，「時」字傷令字也。獨秋傷於濕，作「令」字、傷「時」字，讀者不疑

也。此四者，皆無所亢，而害其所乘之子也邪？從後至，言歲之主氣，各差其分而為病，一定之法也。若說「秋」字傷濕字，其文與上三句相通，其理與法不相通，大抵理與法通，不必拘於文也。故說詩者，不以文害辭，不以辭害意，以意逆志，是為得之矣。故曰「春傷於風。」說作「人為風所傷」，非也。若是，則止當頭痛，惡風自汗，何以言夏為殄泄哉？今言春傷於風，即是時傷令也明矣。《經》云：「東方來者，為嬰兒風。」其傷人也，外在於筋，內舍於肝。又曰：「春甲乙所傷，謂之肝風。」用此二句以較前文，則辭理自通矣。

## 《濕氣所傷論》

## 《濕氣所傷論》

《素問·生氣通天論》篇曰：「秋傷於濕，上逆而欬，發為痿厥。」《陰陽應象大論》曰：「秋傷於濕，冬生欬嗽。」秋濕既勝，冬水復旺，水濕相得，肺氣又衰，故乘肺而為欬嗽。其發為痿厥者，蓋濕氣內攻於臟腑則欬逆，外散於筋脈則痿弱也。當秋之時，濕氣大行，秋傷於濕，濕則干於肺，肺以秋適旺，濕雖入之不能發，至冬肺衰，然後濕始動也。雨淫腹疾，則當發為下利。冬以陽氣內固，濕氣不能下行，故上逆而為欬嗽。秋者，清肅之氣，收斂下行之體也。為濕所傷，是長夏之氣不與秋令也。秋令不及，所勝妄行，故火得以炎上而剋金。心火既刑於肺，故肺氣逆而為欬，所不勝者侮之。木氣上行，與火同德，動而不息者也。所生者受「病，故腎水虧也。長夏已亢，

三焦之氣盛也；命門者，三焦之合也。」故迫 腎水上行，與脾土濕熱相合為痰，因欬而動於脾之濕，是以欬嗽有聲有涎，不發於秋，而發於冬者，以其 六陰之極，肅殺始得其氣故也。但秋傷濕，上逆為欬 嗽，為痿厥，其因病之原，則與春之風，夏之暑，冬之寒 三者同；其令行於時，則與三者異。夫三者皆是本時 之令也，濕乃長夏之令，何於秋言之？蓋春夏冬，每一時各有三月，故其令亦各就其本時而行也。若長夏 則寄旺於六月之一月耳，秋雖亦有三月，然長夏之濕 令，每侵過於秋而行，故曰秋傷於濕。若夫秋傷濕，其令行於時之義，上文已論之矣。前篇所謂「上逆而 欬，發」為痿厥，不言過時，似是當時即發者。但既與 風、暑、寒三者並言，則此豈得獨為即發者乎？然 《經》無明文，終亦不敢比同後篇，便斷然以為冬發 病也。雖然，濕本長夏之令，侵過於秋耳，縱使即 發，亦近於過時 而發者矣。此當只以秋發病者為論。濕從下受，故干 肺為欬，謂之上逆。夫肺為諸氣之 主，今既有病，則氣 不外運，又濕滯經絡，故四肢痿 弱無力而或厥冷也。後篇所謂冬生欬嗽，既言過時， 則與前篇之義，頗不 同矣。夫濕氣久客不散，至冬而 寒氣大行，肺惡寒而 或受傷，故濕氣得以乘虛上侵於 肺，發為欬嗽也。觀者以此意求之，《經》旨其或著 乎。

## 《用藥法》

## 《用藥法》

《難經》云：肺太過，則外證面白善嚏，悲愁不樂欲哭；其內證喘欬上喝，逆氣煩心，胸滿煩熱，夜則涕出多嚏，鼻塞不通。肺金大實，以子助母也。心脾肺皆受寒邪，涎出口甘，水反侮土，寡於畏也。腹中大寒，病名曰寒中，痰白作泡。肺中氣虛而為大寒，子助母也。當於肺中瀉腎水，非辛熱之藥不退也。口甘涎沫者，胃中寒而不和，以辛甘熱去之。飲酒者多有此反化。

《素問欬論》十一證：肝欬，小柴胡湯；膽嘔膽汁，黃芩加半夏生薑湯；心欬，桔梗湯；小腸失氣，芍藥甘草湯；脾欬，升麻湯；胃吐長蟲，烏梅丸；肺欬，麻黃湯；大腸遺矢，赤石脂禹餘糧湯、桃仁湯；不止，豬苓湯；分水腎欬，附子細辛湯；膀胱遺溺，茯苓甘草湯。久欬不已，三焦受之，其狀欬而腹滿，不欲食飲。此皆聚於胃，關於肺，使人多涕唾。面浮腫。氣逆也。錢氏異功散。

## 《朱震亨心法》

## 《朱震亨心法》

### 欬嗽欬嗽

欬嗽有風寒、痰飲、火勞嗽、肺脹之分。

春作是春升之氣，用清涼藥二陳加薄、荊之類；夏是火氣炎上，最重用芩連；秋是濕熱傷肺，冬是風寒外來，以藥發散之後，用半夏逐痰，必不再來。

風寒行痰開腠理用二陳湯，加麻黃、桔梗、杏仁，逐痰飲降痰，隨證加藥。火主清金化痰降火，勞嗽宜四物湯加竹瀝、薑汁補陰為主。

乾欬嗽難治。此係火鬱之證，乃痰鬱其火邪在中，用苦梗開之，下用補陰降火之劑，四物加炒藥、竹瀝之類。不已則成勞。此不得志者有之，《倒倉法》好。

肺虛嗽甚，此好色腎虛者有之，用參膏，以陳皮、生薑佐之，大概有痰加痰藥。

上半日多嗽者，此屬胃中有火，用貝母、石膏降胃火。午後嗽多者，屬陰虛，必用四物湯加炒藥、知母降火。黃昏嗽者，是火氣浮於肺，不宜用涼藥，宜五味子、五倍子斂而降之。五更多嗽者，此乃胃中有食積，至此時火氣流入肺，以知母、地骨皮降之。

肺脹而嗽，或左或右，不得眠，此痰挾瘀血礙氣而病。宜養血以流氣降火，疏肝以清痰，四物湯加桃仁、訶子、青皮、竹瀝、薑汁之類。

嗽而脅下痛，宜疏肝氣，以青皮兼痰藥。實者，白芥子之類，在後，以二陳湯加南星、香附、青黛、青皮、薑汁。血礙氣作嗽者，桃仁去皮尖，大黃酒炒，薑汁丸服。治嗽多用生薑，以其辛散故也。

痰因火動，逆上作嗽者，先治火，次治痰，以知母止嗽清肺，滋陰降火。夜嗽用降，陰分嗽也。

治嗽多用粟殼，不必疑，但要先去病根，此乃收後藥也。治痢亦同。

勞嗽即火鬱嗽，用訶子，能治肺氣因火傷極，遂成鬱遏，脹滿不得眠。一邊取其味酸苦，有收斂降火之功，佐以海石，童便浸香附、苦蕒、青黛、杏仁、半夏麴之類，薑蜜調，噙化必以補陰為主。

治嗽。灸天突穴肺腧穴。大瀉肺氣。肺腧穴。在三椎骨下兩旁各一寸五分。

師云：「陰分嗽者，多屬陰虛，治之。」

有嗽而肺脹壅遏不得眠者，難治。

肺痿專主養肺氣，養血清金。

嗽而肺氣有餘者，宜瀉之，桑白皮為主，半夏、茯苓佐之，瀉其有餘，補其不足。

肺燥者當潤之。屬熱者，桔梗大力、知母、雞清。

聲啞者屬寒，宜細辛、半夏、生薑，辛以散之。肺虛者，人參膏阿膠為主。陰不足者，六味地黃丸為要藥，或知母茯苓湯為妙。陰虛氣喘，四物湯加陳皮、甘草些少，以降其氣，補其陰。白芍藥須用酒浸曬乾。

濕痰帶風喘嗽者，不可一味苦寒折之，如千緡湯、墜痰丸，更以皂角、蘿蔔子、杏仁、百藥煎、薑汁丸噙

化。痰積嗽，非青黛、苦蕒不除。有食積人，面青白黃色不常，面上有如蟹爪路，一黃一白者是。

欬逆嗽，非蛤粉青黛苦蕒貝母不除，口燥咽乾有痰者，不用半夏、南星，用苦蕒貝母。飲水者不用苦蕒，恐泥膈不鬆快。知母清肺止嗽，滋陰降火。

杏仁瀉肺氣，氣虛久嗽者，一二服劫止。

治酒嗽，青黛、苦蕒薑蜜丸噙救肺食積痰作嗽發熱者。半夏、南星為君，苦蕒、蘿蔔子為臣，青黛、石鱗為使。

## 《明戴思恭證治要訣》

## 《明戴思恭證治要訣》

### 欬嗽欬嗽

古人云：「五臟六腑，皆有欬嗽。」夫嗽屬肺，何為臟腑皆有之？蓋欬嗽為病，有自外而入者，有自內而發者。風寒暑濕外也；七情饑飽，內也。風寒暑濕，先自皮毛而入。皮毛者，肺之合，故雖外邪欲傳臟腑，亦必先從其合而為嗽，此自外而入者也。七情饑飽，內有所傷，則邪氣上逆，肺為氣出入之道，故五臟之邪，上蒸於肺「而為嗽，此自內而發者也。然風寒暑濕，有不為嗽者，蓋所感者重，徑傷臟腑，不留於皮毛；七情亦有不為嗽者，蓋病尚淺，止在本臟，未即上攻，所以傷寒以有嗽為輕，而七情饑飽之嗽，久而

復見。凡諸嗽未審內外所感，並宜二陳湯加杏仁、五味、人參各半錢重。飲水一二口而暫止者，熱嗽也；呷熱湯而暫停者，冷嗽也。治熱嗽以小柴胡湯加五味，冷嗽理中湯加五味，皆已試之驗。此出《醫餘》。

諸嗽。皆可佐以「應夢觀音散。」而加喘者。以此於食前吞下養正丹。

壅嗽聲重痰稠。或欬有血。以薄荷、生胡麻各一撮。細嚼。煎蘇子降氣湯送下。

感風而嗽者，惡風有汗，或身體發熱，或鼻流清涕，桂枝湯加人參、杏仁、五味各半錢。

欬嗽多汗，體虛而又不勝熱藥者，「橘蘇散。」

感寒而嗽者，惡風無汗，或身體發熱，或鼻流清涕，宜杏子湯。

若風寒俱感而嗽者，或惡風無汗，或惡風有汗，頭痛身疼，塞鼻熏眼，涕淚稠黏者，小青龍湯。以上三藥，傷寒、太陽經有嗽者，皆可用。

感暑而嗽者。自汗煩渴。或帶寒面垢。六和湯加五味子一錢。

感濕而嗽者，身體痛重，或汗，或小便不利，此多乘熱入水，或冒雨露，或浴後不解濕衣致此，宜白朮湯。熱嗽咽喉乾痛，鼻出熱氣，其痰嗽而難出，色黃且濃，

或帶血縷，或帶血腥臭，或堅如蜆肉，不若風寒之嗽，痰清而白，宜金沸草散，仍以辰砂化痰丸，或薄荷煎、八風丹含化。熱嗽宜金沸草散中加五味、杏仁、茯苓十味。入棗子一箇同煎。功效尤勝。名「旋覆湯。」

有熱嗽，諸藥不效，竹葉石膏湯去竹葉，入粳米，少加知母，多加五味、杏仁。此必審是伏熱在上焦，心肺間可用。

有熱嗽失聲咽痛，多進冷劑而聲愈不出者，宜以生薑汁調消風散，少少進之，或只一味薑汁亦得。冷熱嗽後失聲者尤宜。嗽而失聲者，非獨熱嗽有之，宜審其證用藥，佐以橄欖丸含化，仍濃煎獨味枇杷葉散熱服。

冷熱嗽，因增減衣裳，寒熱俱感，遇乍寒亦嗽，乍熱亦嗽，飲熱亦嗽，飲冷亦嗽，宜金沸草散、消風散各一貼和煎，或應夢人參散，或款冬花散、二母散，仍以辰砂化痰丸、八風丹，或四和丸含化。七情饑飽嗽，無非傷動臟腑正氣，致邪上逆，結成痰涎，肺道不理，宜順為先。四七湯半貼，加桑白皮、杏仁、五味子、人參、阿膠各半錢。

有嗽血，痰與食俱出者，此蓋飲食失節，致肝氣不利，而肺又有客邪，肝濁道，肺清道，清濁相干，宜二陳湯加木香、杏仁、細辛、枳殼各半錢。

有飲冷熱酒，或飲冷水傷肺致嗽，俗謂之「湊肺」，宜紫菀飲。

勞嗽有久嗽成勞者，有因病勞久嗽者。其證寒熱往來，或獨熱無寒，咽乾嗌痛，精神疲極。其痰或濃或有血，腥臭異常，語音不出者，補肺湯半貼，加杏仁、貝母、款冬花、阿膠、百合各半錢，煎，去渣，調鍾乳粉；咽痛者，更加桔梗半錢；熱甚者，更加秦艽半錢；嘔者，去地黃加半夏。如其數氣急者，加靈砂丹，或三炒丹。

經年累月，久嗽不已，服藥不瘥。餘無他證。卻與勞嗽不同。宜三拗湯。仍佐以清金丹。

脾胃如常，飲食不妨者，加味人參清肺湯、參粟湯。有暴嗽服藥不效者，或教之進生料鹿茸丸、大菟絲子丸，方愈。此乃腎虛所致，有本有標，卻不可以暴嗽而遽補之。然所以易愈者，亦覺之早故也。

嗽而有血，見《嗽血證》。

時行嗽，發熱惡寒，頭痛鼻塞，氣急，狀如傷冷熱連欬不已。初得病即伏枕一兩日即輕。記壬午秋，滿城有此病，繼甲午年夏秋之交，此病又自南而北，得免者少，並呼為「蝦蟆瘟。」用參蘇飲加細莘半錢。

有欬嗽痰多者，名曰「勞嗽」，與風寒壅熱之嗽不同。此乃有本有標，本在腎而標在肺，可於虛損諸藥求之，選用加五味、杏仁、阿膠、貝母、款冬花之屬。嗽而加以喘者，於前藥更加磨沉香，仍吞靈砂丹或三炒丹。嗽而有血者，詳見血門嗽血證。

# 《樓英醫學綱目》

# 《樓英醫學綱目》

## 《治法》

## 《治法》

夫欬之為病，有一欬即出痰者，脾勝濕而痰滑也。有連欬十數不能出痰者，肺燥勝痰濕也。滑者，宜南星、半夏、皂角灰之屬，燥其脾，若利氣之劑，所當忌也。澀者，宜枳殼、紫蘇、杏仁之屬，利其肺，若燥肺之劑，所當忌也。肺欬喘息而有音，甚則吐血，麻黃湯。大腸欬而遺矢，赤石脂禹餘糧湯、桃仁湯；不止，用豬苓分水散。

心欬心痛，喉中介介鯁狀，甚則咽喉痺，用桔梗湯。小腸欬欬而失氣，氣與欬俱失，芍藥甘草湯。與夏脈不

及病同，蓋小腸為心之腑故也。肝欬，兩脅下痛甚，不可以轉，轉則兩肱下滿，小柴胡湯。仲景云：「欬引脅痛為懸飲，宜十棗湯。」《丹溪》云：「欬引脅痛，宜疏肝氣，用青皮、枳殼、香附子等，實者白芥子之屬。」膽欬嘔，膽汁，黃芩加半夏生薑湯。脾欬，右脅下痛，陰陰痛引肩背，甚則不可以動，動則欬劇，升麻湯。胃欬嘔，嘔甚則長蟲出，烏梅丸。腎欬，腰背相引而痛，甚則欬涎，麻黃附子細辛湯。膀胱欬，遺溺，茯苓甘草湯。三焦欬，腹滿不欲飲食，此皆聚於胃，關於肺，使人多涕唾而面浮腫，氣逆，錢氏異功散。

凡欬嗽面赤，胸腹脅常熱，惟手足乍有涼時，其脈洪者，熱痰在胸膈也，宜小陷胸湯、蒙石丸之類，清膈降痰。甚而不已者，宜吐下其痰熱也。面白悲噎，或脅急脹痛，或脈沉弦細遲而欬者，寒飲在胸腹也，宜辛熱去之。

## 《乾欬嗽》

## 《乾欬嗽》

乾欬嗽者，無痰有聲是也。此證本於氣瀦。瀦微者，連欬十數聲，方有痰出；瀦甚者，雖欬數十聲，亦無痰出，是為乾欬嗽也。

## 《王綸明醫雜著》

## 《王綸明醫雜著》

## 《欬嗽證治》

## 《欬嗽證治》

「欬謂有聲，肺氣傷而不清。嗽謂有痰，脾濕動而生痰。欬嗽者，因傷肺氣而動脾濕也。病本雖分六氣五臟之殊，而其要皆主於肺，蓋肺主氣而出聲也。治法須分新久虛實，新病風寒則散之，火熱則清之，濕熱則瀉之，久病便屬虛屬鬱，氣虛則補氣，血虛則補血，兼鬱則開鬱，滋之潤之，斂之，則治虛之法也。」方用杏仁去皮尖、白茯苓各一錢，橘紅七分，五味子、桔梗、甘草炙各五分。春多上升之氣，宜潤

肺抑肝，加川芎、芍藥、半夏各一錢，麥門冬、黃芩、炒知母各五分。春若傷風 欬嗽，鼻流清涕，宜辛涼解散，加防風、薄荷、黃芩、炒麥門冬各一錢。

註 按前證若因風寒所傷，欬嗽聲重頭痛，用金沸草散。欬嗽聲重，身熱頭痛，用《局方》消風散。蓋肺主皮毛，肺氣虛則腠理不密，風邪易入，法當解表兼實肺氣。肺有火則腠理不閉，風邪外乘。治宜解表兼清肺火，邪退即止。若數行解散，則重亡津液，邪蘊而為肺疽肺痿矣。故凡肺受邪不能輸化，而小便短少，皮膚漸腫，欬嗽日增者。宜用六君子以補脾肺。六味丸以滋腎水。

夏多火熱，炎上最重，宜清金降火，加桑白皮、知母、黃芩、炒麥門冬、石膏各一錢。

註 按：王太僕云：「壯水之主，以制陽光。」前證若喘急而嗽，面赤潮熱，其脈洪大者，用黃連解毒湯；熱燥而欬，用梔子仁湯；欬唾有血，用麥門冬湯，俱兼以六味丸。夏月尤當用此壯腎水，以保肺金。

秋多濕熱傷肺，宜清熱瀉濕，加蒼朮、桑白皮各一錢，防風、黃芩、山梔炒各五分。

註 按「前證若欬而身熱自汗，口乾便赤，脈虛而洪者，用白虎湯。身熱而煩，氣高而短，心下痞滿，四肢困倦，精神短少者，香薷飲。若病邪既去，宜用補中益氣加乾山藥、五味子，以養元氣，柴胡、升麻各二分，以升生氣。」

冬多風寒外感，宜解表行痰，加麻黃、桂枝、半夏、乾薑、防風各一錢；肺金素有熱者，再加酒炒黃芩、知母各五分；若發熱頭痛，鼻塞聲重，再加藁本、川芎、前胡、柴胡各一錢。

註 按前證果係風寒外感，形氣病氣俱實者，宜用麻黃之類，所謂從表而入，自表而出。若形氣病氣俱虛者，宜補其元氣，而佐以解表之藥。若專於解表，則肺氣益虛，腠理益疏，外邪乘虛易入，而其病愈難治矣。若病日久，或誤服表散之劑，以致元氣虛而邪氣實者，急宜補脾土為主，則肺金有所養，而諸病自愈。若人老弱。或勞傷元氣而患前證。誤用麻黃枳殼紫蘇之類。而汗出亡陽者。多患肺癰肺痿。治失其宜。多致不起。

若有痰加半夏、枳殼；風痰再加南星，薑汁炒；濕痰脾困少食，加白朮、蒼朮；有痰而口燥咽乾，勿用半夏、南星，宜加知母，蜜水拌炒，貝母、苦蕒仁、黃芩炒。

註 按：「前證若因脾氣虛而為濕痰者，宜用補中益氣湯；若因腎經虛熱而口燥咽乾者，宜用六味丸。」

若夏月熱痰，或素有熱痰，加黃芩、黃連、知母、石膏。」

註 按「前證若心火乘肺，輕則用麥門冬湯，重則用人參平肺散。若上焦實熱用涼膈散，虛熱用六君子湯；中焦實熱用竹葉石膏湯，虛熱用竹葉黃芪湯；下焦虛熱用六味丸。」

上半日欬者，胃中有火，加貝母、石膏、黃連。五更欬者，同上。

註 按：「前證若胃中熱甚為患者，宜用本方泄之，若胃中微熱為患者，當用竹葉石膏湯清之。若胃中

虛熱所致者。須用補中益氣湯補之。俱少佐以治痰之劑。其五更欬嗽者。當作脾虛宿食為痰治之。

若欬嗽久肺虛，滋氣補血，加人參、黃芪、阿膠、當歸、生薑、天門冬、款冬花、馬兜鈴、芍藥，酒炒之類。肺熱喘嗽，去人參，加沙參，此兼補血氣也。

註 按：肺屬金，生於脾土。凡肺金受邪，由脾土虛弱，不能生肺，乃所生受病，治者審之。

黃昏欬者，火浮於肺，不可正用寒涼藥，宜加五味子、五倍子、訶子皮斂而降之。

註 按：前證屬脾肺氣虛，以致腎經陽虛陰弱，而虛火上炎，或房勞太過，虧損真陰為患。法當補脾肺，生腎水，不可專主於肺也。

若午後嗽者，屬陰虛，即勞嗽也，宜補陰降火，加川芎、當歸、芍藥、熟地、黃、蘗、知母、竹瀝、薑汁、天門冬、苦蕒仁、貝母，此專補陰血也。

註 按：前證屬腎氣虧損，火炎水涸，或津液湧而為痰者，乃真臟為患也。須用「六味地黃丸壯腎水，滋化源為主，以補中益氣湯養脾土，生肺腎為佐。」設用清氣化痰則誤矣。

若火鬱嗽，為「痰鬱」，火邪在中，宜開鬱消痰，用訶子皮、香附、童便浸，苦蕒仁、半夏麵、海石、青黛、黃芩，為末，蜜調為丸，噙化，仍服前補陰降火藥。失治則成勞。

註 按前證「若因肺胃蘊熱，痰氣不利，宜用此。若因脾肺不清，氣鬱痰滯，用二陳加山梔、枳

殼、桔梗。若因鬱結傷脾，氣血虛損，用濟生歸脾加山梔、桔梗。若因怒動，肝火剋脾，用四君子加山梔、柴胡。若勞役失宜，傷損元氣，用補中益氣加山梔、桔梗。

若痰積食積作欬嗽者，用香附、苦蕒、貝母、海石、青黛、半夏、麴石膏、山楂、枳實黃連薑炒為末，蜜調，噙化。

註 按前證若因飲食停滯，胃口濕熱所化者，宜用本方。若因脾胃氣虛而痰積滯，用六君子加枳殼、木香。若因脾胃氣虛而食積滯，用六君子加神麴、麥芽。夫早間吐痰欬嗽，屬食積喘促，欬嗽屬肺氣虛火旺，大抵當助胃壯氣為主，不可專攻其痰。

若勞嗽見血，加阿膠、當歸、芍藥、天門冬、知母、貝母、桑白皮，亦於前肺虛陰虛二條擇用。大抵欬嗽見血，多是肺受熱邪，氣得熱而變為火，火盛而陰血不寧，從火上升，故治宜瀉火滋陰，忌用人參等甘溫之藥。然亦有氣虛而欬血者，則宜用人參、黃芪、款冬花等藥，但此等證不多耳。

註 按前證亦有勞傷元氣，內火妄動而傷肺者；亦有勞傷腎水，陰火上炎而傷肺者；有因過服「天門生地寒藥，損傷脾胃，不能生肺金而不愈者；有因誤用黃蘗之類，損傷陽氣，不能生陰精而不愈者。」凡此皆脾肺虧損，而腎水不足，以致虛火上炎

真臟為患也。須用補中益氣湯補脾土而生肺金，用六味地黃丸滋腎水而生陰精，否則不救。

因欬而有痰者，欬為重，主治在肺；因痰而致欬者，痰為重，主治在脾。但是食積成痰，痰氣上升，以致欬嗽，只治其痰，消其積，而欬自止，不必用肺藥以治欬也。

註 按：前論治法最是，仍分六淫、七情及五臟相勝，脾肺虛實以治之，否則恐成肺癰之證。

## 《李梴醫學入門》

## 《李梴醫學入門》

### 《欬嗽總論》

### 《欬嗽總論》

欬嗽，多屬肺火。《傷寒》言「太陽病」者，何也？肺為五臟華蓋，內通膀胱，外主皮毛，而為氣之主。氣逆而不下則欬。風寒乘之，氣冷則滯；熱邪乘之，氣燥則鬱；水飲乘之，與氣相搏。寒熱水氣皆能生痰，又欬之所從始也。以風寒言之，太陽證身熱嘔喘者，麻黃杏仁湯；欬喘者，三拗湯；少陽證寒熱胸滿，或挾瀉者，小柴胡去參、棗，加五味子、乾薑。少陰證，厥逆腹痛下利者，四逆湯加五味子、乾薑。少陰欬而嘔渴，心煩不得眠，下利者，豬苓湯。春冬傷風寒，夏秋傷濕冷，鼻塞喉鳴，氣不得下而欬者，橘皮

竹茹湯。以熱欬言之，金沸草散、柴胡半夏湯、瀉白散。或欬膿血者，小柴胡加黃芩、黑豆。欬嗽身熱，臍腹滿痛者，大柴胡湯下之。中滿而嘔者，大半夏湯。解利以後胃寒不食者，理中湯、六君子湯，俱加五味子細辛。痰氣盛者，大橘皮湯。素有痰火者，當於芩連二陳湯中消息。又水欬者有三證，青龍湯治太陽之表水，有寒；十棗湯治太陽之裏水，有癖；真武湯治陰證之裏水，有寒。凡欬而小便利者，忌汗，久而入臟成勞，膏之上，肱之下。不治。

## 《辨欬嗽》

## 《辨欬嗽》

欬因氣動為聲，嗽乃血化為痰。肺氣動則欬，脾濕動則嗽，脾肺俱動則欬嗽俱作。然以肺為主，故多言欬，則包嗽在其中。

## 分虛實分虛實

欬必先審肺脈虛實。實者浮大有力，若沉而滑，則痰氣盛也。虛者弦大無力，若沉細帶數，則火鬱極也。

## 外感外感

風乘肺欬，則鼻塞聲重，口乾喉痒，語未竟而欬，「參蘇飲加桑白皮、杏仁，或柴胡半夏湯，後用諸欬丸。如久欬夜欬，冬欬，風入肺竅者，宜熏之。」

寒乘肺欬，則胸緊聲啞，二陳湯加麻黃、杏仁，或蘇沉九寶飲、華蓋散、單生薑丸。有寒熱者，小柴胡湯。又有一種遇寒則欬者，謂之「寒暄」，乃寒包熱也。解表則除，枳梗湯加麻黃、防風、杏仁、陳皮、紫蘇、木通、黃芩。如風寒鬱熱夜欬者，三拗湯加知母、黃芩。

暑乘肺欬，則口燥，聲嘶吐沫，六一散加辰砂。見血者，枇杷葉散。

濕乘肺欬則身重，骨節煩疼洒淅，五苓散、「不換金正氣散。」

大概「春氣上升，潤肺抑肝；夏火上炎，清金降火；秋濕熱甚，清熱瀉濕；冬風寒重，解表行痰。」

## 內傷內傷

火欬，聲多痰少。五更欬多者，食積濕，濕火流肺中，瀉白散加知母，或古二母散。上半午欬多者，胃有實火，單石膏丸加知、貝。便閉喘渴痰稠者，涼膈散、敗毒散，古芩半丸。下半午欬多者，陰虛四物合二陳湯，加知母、黃蘗、麥門冬，順而下之。如陰虛火燥，寒熱盜汗，遺精見血者，四物湯加竹瀝，或滋陰降火湯，加味二母丸黃昏欬多者。火浮於肺。潤肺丸以斂之。不可純用涼藥。通用二陳湯去半夏。加貝母苦蕒青黛山梔黃芩桑白皮。

鬱欬即火欬，久者乾欬無痰，乃腎水焦枯，邪火獨炎於肺，瀉白散加苦梗為君以開之。久者，訶黎丸。虛者，腎氣丸。不得志者，霞天膏。如肺燥皮枯，瘡痒便閉者，活血潤燥生津飲。

勞欬。五勞虛欬也。疲極傷肝，欬而左脅疼引小腹者，一陳湯加芎、歸、芍藥、青皮、柴胡、龍膽、黃芩、竹茹，或黃芪建中湯。勞神傷心，欬而咽乾咯血者，劫勞散、「夢授天王補心丹。」勞倦傷脾，欬而短氣無力者，調中益氣湯、補中益氣湯。叫呼傷肺，欬而嘔吐白沫，口燥聲嘶者，潤肺丸、人參清肺飲。房勞傷腎，欬而腰背痛寒熱者，二陳芎歸湯。又有一種傳證癆欬，即乾欬勞久者，宜蛤蚧、天靈蓋、雄黃、硃砂之類，須於「癆瘵」條參治。食欬因食積生痰，氣衝胸腹滿者，二陳湯加厚朴、山楂、麥芽。傷生冷致脾胃不清，噁酸吐瀉，惡風寒者，五積散、理中湯、異功散。傷煎炒熱物者，葶蘆散或三補丸加知母、貝母。傷酒食者，香附苦蕒青黛丸。《七情》臟氣不平則欬，久不已則入六腑。怒傷肝，兩脅下滿；入膽則嘔苦汁，喜傷心，心痛咽腫；入小腸則欬與氣俱失；思傷脾欬，右脅引肩背，痛甚則不可以動；入胃則吐痰沫長蟲；憂傷肺，喘息唾血；入大腸則遺糞，恐傷腎，唾涎，腰背引痛；入膀胱則遺尿；入三焦則腹滿不欲食。始則關於肺，終則聚於胃也。宜二陳湯加蕁仁、蘿蔔子、加味瀉白散、參蘇飲、四七湯、蘇子降氣湯、團參飲子、古橘甘散、古橘蕁丸、加減三奇湯選用。

## 痰水上干痰水上干

痰欬，痰出欬止，胸膈多滿。《經》曰：「秋傷於濕，冬必欬嗽。」濕在心，謂之熱痰；濕在肝，謂之風痰；濕在肺，謂之氣痰；濕在腎，謂之寒痰。惟濕痰入胃，上干於肺，則必作欬，宜千緡湯、墜痰丸、半苦丸選用。痰鬱肺經，欬則涎多，或結胸者，二陳湯加枳梗、苦蕒、黃芩、貝母，甚者鶴頂丹。痰積流入肺腕，久欬不得睡者，兜鈴丸。痰因火動者，二陳湯加芩連，或「清氣化痰丸。」痰因宿食者，化痰丸。痰因酒濕者，蜂蕒丸，因酒者，苦連丸。如痰甚，能食便閉者，小承氣湯下之。不能食便閉者，厚朴湯，或滾痰丸疏導之。

水欬，因飲茶水，停蓄為涎上湧，身熱胸滿，怔忡者，小青龍湯；身寒脅硬者，真武湯。結胸者，小半夏湯。大便閉者，十棗湯。小便澀者，五苓散。詳「《傷寒》水證中。」

## 瘀血內阻瘀血內阻

瘀血欬，則喉間常有腥氣，輕者瀉白湯加生地、山梔、牡丹皮、麥門冬、桔梗，重者桃仁、大黃、薑汁為丸服。或因打損，勞力傷肺，遇風寒則欬，或見血紫黑色者，四物湯去川芎，加大黃、蘇木，為末，酒調服。利去心肺間瘀血即止，後服人參養榮湯調理。

肺脹滿，即痰與瘀血礙氣，所以動則喘急，或左或右，一邊眠不得者是，四物湯加桃仁、訶子、青皮、竹瀝、薑汁。若虛脹喘者，單人參膏、古百花膏。有水停蓄脹者，飲水則逆轉不入，三白湯加澤瀉、桔梗、五倍

子。若因火傷極，無水以升而脹者，必乾欬無痰，訶黎丸含化，以訶子有收斂降火之功，然亦危哉。

## 治分新久治分新久

新欬有痰者，外感隨時解散，無痰者，便是火熱，只宜清之。久欬有痰者，燥脾化痰，無痰者，清金降火。蓋外感久則鬱熱，內傷久則火炎，俱宜開鬱潤燥。其間有七情氣逆者，則以枳殼、香附順氣為先；停水宿食者，則以南星、檳榔分導為要；氣血虛者，補之斂之。苟不治本，而浪用兜鈴、粟殼澀劑，反致纏綿。況肺為嬌臟，易寒易熱，雖人參平藥，惟氣虛最宜。若肺有火，及風邪初盛者，俱宜沙參或元參代之，故欬不拘於寒也。久欬曾經利下，及勞倦饑飽，以致肺胃寒而飲食少進者，只理脾而欬自止。然腎為氣臟，欬嗽動引百骸，自覺氣從臍下逆奔而上者，乃腎虛氣不歸元，宜所服藥中加補骨脂、五味子，或三味安「腎丸。陰虛者腎氣丸。陽虛者黑錫丹以鎮之。凡欬至肺脹及咽瘡失音者，必死。



本作品在全世界都属于[公有领域](#)，因为作者逝世已经超过100年，并且于1930年1月1日之前出版。



本作品原文沒有標點。標點是人工智能程序[古詩文斷句 v2.1](#)創建，並且經由維基文庫用戶編輯改善的。本站用戶之編輯以[知识共享 署名-相同方式共享 4.0协议 \(CC BY-SA 4.0\)](#) 發佈。



歡迎各位持續修正標點，請勿複製與本站[版權協議](#)不兼容的標點創作。

# About this digital edition

This e-book comes from the online library [Wikisource](#)<sup>[1]</sup>. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)<sup>[2]</sup> license or, at your choice, those of the [GNU FDL](#)<sup>[3]</sup>.

Wikisource is constantly looking for new members. During the realization of this book, it's possible that we made some errors. You can report them at [this page](#)<sup>[4]</sup>.

The following users contributed to this book:

- Kwj2772
- Jdx
- Rocket000
- 維基小霸王
- Santoposmoderno
- HereToHelp

- Victormoz
- Srittau
- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

- 
1. [↑ https://wikisource.org](https://wikisource.org)
  2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
  3. [↑ https://www.gnu.org/copyleft/fdl.html](https://www.gnu.org/copyleft/fdl.html)
  4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)